

Sakspapir

Sakshandsamar	Arkiv	ArkivsakID
Frank Kvinge	FA-C00, FE-223	23/482

Saknr	Utval	Type	Dato
052/2023	Formannskapet	PS	05.06.2023

Tildeling av Kulturtiltaksmidler 2023

Rådmannen sitt framlegg til vedtak:

Skriv inn framlegg til vedtak her

Saksopplysningar:

Bakgrunn

I formannskapsmøte 18.11.2014 vart Kraftspela lagt ned. Kraftspela vart etablert i 2005 og gjekk i kommunal regi. Festivalen hadde eit stort og allsidig kulturprogram med brei involvering av lokalt kultur-, nærings-og lagsliv i tillegg til innleigde artistar og aktørar av høgt nasjonalt og internasjonalt kaliber. Som erstatning for Kraftspela ønskte formannskapet å stimulera lokalt lags-og næringsliv, og andre aktørar til å stå som kulturarrangør, slik at ein i kommunen framleis kunne tilby varierte og gode kulturopplevingar. For 2015 vart det sett av kr 150 000 der arrangørar kunne søkja kommunal medfinansiering til slike tiltak gjennom kraftfondbudsjettet. Etter dette har summen vore kr 100 000 pr år.

Fakta

Kulturtiltaksmidlane for 2023 vart kunngjort på kommunen si heimeside/ Facebookside, plakatar på butikkane i kommunen og i kommunal informasjon i Strilen og i Masfjordingen.

Det har kome inn 6 søknader.

Søklarane er:

1.Kvingo nærkjøp v/ Kariann Ekren

søker stønad til kulturaktivitetar knytt til Nærbutikken, Snikkarbua kafé &pub og bubilparkering på Kvingo.

Sidan butikken vart starta opp i 2009 har eigar hatt eit stort fokus på å skapa aktivitet i bygda og driva bygdeutvikling for auka livskvalitet, med marknadsdagar, quiz-kveldar, eldretreff, barnearrangement, førjularrangement, konsertar,dansearrangement mm. Eigaren har gjort store investeringar i

bygningssmassen rundt butikken. 2017 sto Snikkarbua kafe&pub ferdig. I 2018 fekk bedrifta eige hus til overnattingslokale. I 2019 var storsalen ferdig pussa opp med lydisolasjon, utvida scene og utvida uteplass på nordsida av lokalet. Dette gjer det lettare å halda fleire typar arrangement i kombinasjon med storsalen. Salen kan dekkast til 150 personar, og i konsertsamanheng har salen plass til kring 200.

I 2020 vart bubilplassen utvida, slik at det er plass til 30 bubilar på området.

Mange av bubilgjestane er interesserte i å nytta seg av naturtilboda i området. Det vert difor arbeid med å arrangera fellesturar, med felles måltid og sosialt samver etterpå.

Artistar står i kø for å spela i Snikkarbua, og eit kulturtilskot vil mellom anna gå til honorar til artistar. Dei besøkande er frå heile regionen/fylket.

I 2021 hadde verksemda stor suksess med Vamp-arrangementet og meir enn 400 selde billetter.

Grunna stive prisar har det vore vanskeleg å stella i stand tilsvarande storarrangement, men det er og blir gjennomført arrangement og tiltak utover i heile 2023, konsertar, dansetilstellingar, stand-up, bingokveldar, halloween-fest, ymse julebord, og Vinterlys vinteren 2023-24.

Snikkarbua fekk tilskot kr 15000 i 2022.

2. Sandneskaféen 2728

Etter at Sandneskaféen /Fjordtun kafé vart lagt ned ved førre årsskifte har Sandnes Vel og eldsjeler overteke og vidareført ei enkel drift, der det vert lagt til rette for arrangement om lag ein gong i månaden, i tillegg til utleige til ymse arrangement.

Kaféen søker tilskot til å dekkja utgifter til artistar. Så langt i 2023 er det gjennomført fleire kafékveldar med levande musikk og Open scene der alle som ville, uavhengig av alder og erfaring, fekk ei scene å stå på og der erfarne artistar vart nytta som husband. Slike tiltak vil ein og halda fram med til hausten. Ein vil og samarbeida med Sommarscena om konsertar og kulturarrangement i sommar.

Det er første gong Sandneskaféen 2726 søker kulturtiltaksmidlar.

3. Masfjorden sokn

Masfjorden sokn søker midlar til dekking av kostnader ved konsertar og andre arrangement som vert haldne i kyrkjene, og til dekking av kostnader ved utstilling i kyrkjeromma.

Masfjorden sokneråd ynskjer at kyrkjene i større grad enn tidlegare skal nyttast som ramme for kulturelle tilskipingar, og har gjort prinsipp om at ein for 2023 skal få i stand minst to kulturelle tilskipingar i kvar av dei tre soknekyrkjene.

Eit tilskot vil bli nytta til å dekkja eventuelle underskot på arrangement, slik at ein kan gå ut og gjera avtalar med artistar og kunstnarar med visse om at avtalane er økonomisk gjennomførbare.

Det er første gong Masfjorden sokn søker kulturtiltaksmidlar.

4. Country-kaféen

Etter at Kafé Kritthuset la ned drifta i Fensfjordbygg overtok Anne Kvellestad Klakegg i desember 2022 kafédifta i lokalet, og etablerte Country-kaféen.

Det vert søkt om tilskot til kulturelle aktivitetar i 2023 i og rundt kaféen. Dette gjeld filmkveld, livemusikk, Quizkveldar, lan-møte og amcar/veteranbiltreff.

Det er første gong kaféen søker kulturtiltaksmidlar.

5. Fjon UIL

søker om kr 5000 i støtte til mosjonsløpet Masfjordsprinten. Tilskotet er tenkt nytta til

deltakarpremiar.

Arrangementet går av stabelen 8. juli. Løpet vart for første gong arrangert i 2017 i området rundt Sandnes skule og vart eit særskilt vellukka arrangement med stor deltaking av folk i alle aldrar.

Løpet blir lagt opp etter mønster for internasjonal skisprint, med innleiande rundar, kvartfinale, semifinale og finale. Kjønnss- og aldersinndeling.

Fjon UIL ønskjer å skapa eit breiare idrettsmiljø på Sørsida, og ser på dette som eitt steg på vegen. Masfjordsprinten vart ikkje arrangert i 2022, men fekk i 2021 kr 4000 i tilskot.

6. Nordhordland musikkteater

Tidlegare i år søkte Nordhordland musikkteater om kr 20 000 i tilskot til den nyskrivne forestillinga « Frå hav til fjell i Nordhordland ». Framsyninga skal turnera i Nordhordland september 2023.

Framsyninga har som mål å få fram historiane og hyllesten av naturen, kulturen og folket i Nordhordland slik Arne Høyland presenterer det i sine utallige viser.

Gjennom mange år har Arne laga tekstar og melodiar om unike menneske, om levemåtar frå dei ytste øyar til innerst i fjordane og opp på fjella. Viser som fortel om enkeltmenneske og om tradisjonar som i Arne sine tekstar vert formidla med alvor og skjemt, galskap og varme.

Vurdering

Rådmannen finn det gledeleg at det er interesse blant lag og bedrifter for å stella i stand gode kulturarrangement i kommunen. Det vitnar om tiltakslyst og aktive og visjonære ressurspersonar/lag/bedrifter som ønskjer å skapa noko positivt i kommunen vår.

Etter at Kraftspela vart avvikla er kommunen si rolle endra frå å vera arrangør til å vera tilretteleggar gjennom å yta tilskot og service til arrangørane. Søknadane har bra spennvidde og presenterer tiltak som vil gje varierte kulturopplevingar for alle. Dette var også ønskje og målet til formannskapet då tilskotsordninga vart etablert i 2015. I vedtaket vart det ikkje lagt føringar for kvar og når tiltaka skulle gjennomførast, og kor mange tiltak som kunne rekna med støtte. Det viktigaste var at ordninga skulle gje lokale aktørar inspirasjon og støtte til å gå i gang med nyskapande og spennande kulturarrangement, og å vidareutvikla alt det gode ein har frå før.

Fleire av søkjarane er næringsaktørar og har etablert samarbeid med kommunen om tiltak. Med kommunen sin avgrensa kapasitet som kulturarrangør er dette vinn-vinnsituasjonar. Tiltaka vil samla sett gje gode idretts- og kulturtilbod til alle aldersgrupper.

To av tiltaka som opp gjennom åra har fått tilskot, Stordalen fjellfestival og Sleirsfjellet opp, vert ikkje lenger arrangert. Rådmannen vonar at arrangementa kan bli etablert igjen, i ei eller anna form.

Kvingo nærkjøp er etter kvart ein godt etablerte kulturinstitusjon og tilbyr arrangement som er med på å styrka deira næringsgrunnlag, samstundes som dei opnar opp for kulturaktivitetar som dei andre laga ikkje tilbyr. Arenaene kan vera ei god scene for lokale utøvarar og eit vertskap for tilreisande som søker kulturtilbod. Aktiviteten er høg, med mange gjennomførte og planlagde kulturarrangement i 2023.

Sandneskafén 2728 og Country-kaféen er nye søkjarar i denne kategorien. Sandneskaféen 2728 tek sikte på å vidareføra den kulturelle aktiviteten som har kjenneteikna kaféen dei fem siste åra, og har alt vist at dei er godt i gang med dette. Country-kaféen har sett seg som mål å gje varierte kulturtilbod, noko som vil vera eit kjært tilskot til aktiviteten i og rundt Nordbygda senter/ Fensfjordbygg.

Masfjorden sokn

Rådmannen er i utgangspunktet noko i tvil om søkjaren høyrer inn under denne søknadsordninga

ettersom drift av kyrkjene alt er finansiert av kommunen. Samstundes meiner rådmannen at ein bruk av kyrkjene slik soknet legg opp til vil vera eit fint supplement til andre lokale i kommunen vår, og danna ei fin ramme rundt tilskipingane som vert lagt der. Kyrkjene er ulike, og har kvar i seg kvalitetar som gjer dei godt eigna for ulike tilskipingar. Kyrkjene vert i dag til ein viss grad nytta til konsertar, også med kommune eller lag& organisasjonar som arrangør. Å få til eit betre samarbeid mellom sokna og andre om tilskipingane er både naturleg og ynskjeleg.

Masfjordsprinten til Fjon UIL er eit flott idrettstiltak. Tidlegare år har denne sprinten saman med Sleirsfjellet opp, Matre triatlon og Bjørn West-marsjen i tillegg til trimkarusellar og fjelltrim gitt varierte idrettstilbod fordelt utover heile kommunen. Når nokre av desse tiltaka no ikkje lenger eksisterer bør det vera eit mål å etablera nye tiltak slik mellom anna Risnes IL har gjeve signal om etter at «Sleirsfjellet opp» vart lagt ned.

Det er eit viktig tiltak **Nordhordland musikkteater** har gått i gang med. Det er på høg tid at visene til Arne Høyland vert løfta fram slik det her er tenkt.

Framsyninga vil gje forståing og innsikt i kystkulturen vår i eit historisk perspektiv, og vil vera ei bevisstgjerding av kor naturvenleg ressursutnyttinga har vore i Nordhordland. Dette er eit tema som har blitt svært aktuelt i samband med fokus på « det grønne skiftet».

Og så kan vi gle oss til å sjå framsyninga på Nordbygda samfunnshus i september! Artistar & aktørar frå Masfjorden har ei sentral rolle både på scena og i orkesteret.

Masfjorden kommune har alt løyvd kr 10 000 til dette tiltaket.*

Generelt

Rådmannen meiner det er viktig at alle arrangørane også ser etter andre finansieringskjelder (td Gjensidigestiftelsen, Sparebanken Vest, Eviny m.fl.) slik at inntektssida kan bli styrka. Tilskotsportalen kan og gje gode idear til kvar ein kan henta midlar.

Restsum kr 13 000 er ikkje tildelt. Summen blir øyremerka kulturprogrammet ved Stordalen fjellstove under Bjørn West-marsjen.

Konklusjon

Basert på søknadane og vedlagte budsjett innstiller rådmannen på at tilskot vert fordelt slik:

Søkjar	Tiltak	Dato	Søknadssum 2023	Tilskot 2023
Kvingo nærkjøp	Kulturarrangement	Heile året	20000	20 000
Sandneskaféen 2726	Kulturarrangement på kulturkaféen	Heile året	15000	17 000
Masfjorden sokn	Kulturarrangement i kyrkjene	Heile året	30000	18 000

Countrycaféen	Kulturarrangement på kaféen	Heile året	15000	17 000
Fjon UIL	Masfjordsprinten	Juli	5000	5 000
Nordhordland musikkteater	«Frå hav til fjell i Nordhordland»	Sept	20000	*10 000
Ikkje tildelt				13 000
SUM				100 000

Formannskapet - 052/2023

FS - behandling:

Framlegg til vedtak vart samrøystes vedteke.

FS - vedtak:

Tildeling av Kulturtiltaksmidlar 2023 vert fordelt slik:

Søkjjar	Tiltak	Dato	Søknadssum 2023	Tilskot 2023
Kvingo nærkjøp	Kulturarrangement	Heile året	20000	20 000
Sandneskaféen 2726	Kulturarrangement på kulturkaféen	Heile året	15000	17 000
Masfjorden sokn	Kulturarrangement i kyrkjene	Heile året	30000	18 000
Countrycaféen	Kulturarrangement på kaféen	Heile året	15000	17 000
Fjon UIL	Masfjordsprinten	Juli	5000	5 000
Nordhordland musikkteater	«Frå hav til fjell i Nordhordland»	Sept	20000	*10 000
Ikkje tildelt				13 000
SUM				100 000

